

বাবা-মায়ের আদরের সন্তান রাহুল। রাহুল স্বভাবে খুবই শান্তশিষ্ট এবং
ভদ্র। বিকাল হলেই সে বন্ধুদের সাথে মাঠে খেলে।

রাহুল দুধ খায়, ডিম খায়, মাংস খায়, সবজিও খায় কিন্তু মাছ খেতে
চায় না। কেন সে মাছ খায় না জিজ্ঞেস করলে সে তেমন কোনও ভালো
জবাবও দিতে পারে না।



সকালে রাহুলের মা রান্না করছিলেন, আর রাহুল ঘরের মেঝেতে বসে মনোযোগ দিয়ে ছবি আঁকছিল। মা রান্নাঘর থেকে তাকে চোখে চোখে রাখছিলেন।

রাহুল ছবি আঁকা শেষ করে মাকে এনে দেখাল। মা দেখলেন রাহুল একটা গাছপালা ঘেরা গ্রামের ছবি আঁকেছে। সেই ছবিতে গ্রামের পাশ দিয়ে বয়ে চলা একটা নদী আছে, নদীতে আবার বড়ো বড়ো মাছ সাঁতার কাটছে।



রাহুলের মা তার আঁকা ছবিটা দেখে খুব খুশি হলেন। রাহুলকে জড়িয়ে ধরে আদর করে তার কপালে একটা চুমু দিলেন।

মায়ের আদর পেয়ে রাহুল তো বেজায় খুশি! তখন তার মা জিজ্ঞেস করলেন, রাহুল তুমি তো মাছ খাও না, তাই না?

রাহুল বলল, মা, আমার মাছ খেতে ভালো লাগে না।

তাহলে ছবিতে মাছ আঁকলে কেন?

রাহুল মাকে কিছু না বলেই খিলখিল করে হাসল।



মা রাহুলকে কাছে বসিয়ে বললেন, তুমি কি জানো, আমাদের বাংলাদেশ নদীর একটি দেশ। সারা দেশ জুড়ে জালের মতো নদীগুলো ছড়িয়ে আছে। এই নদীগুলোতে অনেক মাছ পাওয়া যায়। এছাড়াও বাঙালির সবচেয়ে প্রিয় খাবার হচ্ছে ভাত আর মাছ। সেজন্য বাঙালিদের বলা হয়- ভাতে-মাছে বাঙালি।

